

## JAMINAN DAN TANGGUNG RUGI OLEH INDIVIDU ATAU SYARIKAT

JAMINAN DAN TANGGUNG RUGI ini dibuat pada hari dan tahun yang dinyatakan dalam Seksyen 1 Jadual di bawah antara pihak yang dinyatakan dalam Seksyen 2 Jadual ("**Penjamin**") sebagai satu pihak dan CIMB BANK BERHAD (13491-P) di Aras 13, Menara CIMB, Jalan Sentral 2, Kuala Lumpur Sentral, 50470 Kuala Lumpur dan mempunyai tempat perniagaan di alamat yang dinyatakan dalam Seksyen 3 Jadual bersama-sama ini ("**Bank**") sebagai pihak yang satu lagi.

### BAHAWASANYA

#### (a) Perjanjian Kemudahan

Atas permintaan Penjamin, Bank telah bersetuju untuk menyediakan suatu Kemudahan dalam jumlah amaun pokok yang dinyatakan dalam Seksyen 4 Jadual di bawah ("**Kemudahan**"), untuk pihak yang dinyatakan dalam Seksyen 5 Jadual ("**Peminjam**") menurut terma dan syarat yang terkandung dalam Perjanjian Kemudahan dan Surat Tawaran, tiap-tiap satunya bertarikh pada hari dan tahun yang berkaitan yang dinyatakan dalam Seksyen 6 Jadual (bersama-sama, "**Perjanjian Kemudahan**").

#### (b) Jaminan dan Tanggung Rugi ini

Ia merupakan suatu terma Perjanjian Kemudahan bahawa Penjamin mengeluarkan Jaminan dan Tanggung Rugi ini kepada Bank. Sekiranya Penjamin terdiri daripada lebih daripada satu (1) penjamin, penjamin-penjamin tersebut akan dianggap sebagai telah mengeluarkan Jaminan dan Tanggung Rugi ini atas dasar bersama dan berasingan, sama ada mereka telah menandatangani Jaminan dan Tanggung Rugi asal yang sama atau kaunterpart yang berasingan.

IA ADALAH DIPERSETUJUI: -

## 1 TAKRIF DAN TAFSIRAN

### 1.1 Takrif

Perkataan dan ungkapan dalam Jaminan dan Tanggung Rugi ini hendaklah mempunyai erti berikut:

<b>Peminjam</b>	Pihak-pihak yang dinyatakan dalam Seksyen 5 Jadual dan termasuk harta pusaka, pewaris, wakil diri, pemegang serah hak yang dibenarkan dan/atau pengganti hak milik dia/mereka;
<b>Kemudahan</b>	Kemudahan yang dinyatakan dalam Seksyen 4 Jadual;
<b>Perjanjian Kemudahan</b>	Perjanjian Kemudahan dan Surat Tawaran yang dinyatakan dalam Seksyen 6 Jadual;

<b>Penjamin</b>	Pihak-pihak yang dinyatakan dalam Seksyen 2 Jadual;
<b>Keberhutangan</b>	<p>(a) mempunyai erti yang diberikan kepadanya dalam Perjanjian Kemudahan, sebagaimana yang dipinda dari semasa ke semasa; atau</p> <p>(b) (jika “<b>Keberhutangan</b>” tidak ditakrifkan dalam Perjanjian Kemudahan) semua wang, hutang dan liabiliti lain pada masa ini dan masa hadapan yang kena dibayar, terhutang atau ditanggung oleh Peminjam atau Pendeposit atau mana-mana pihak cagaran kepada Bank di bawah sebarang dokumen yang diikat berkenaan dengan Kemudahan (dalam setiap kes, sama ada bersendirian atau bersesama, atau bersesama dan berasingan, dengan mana-mana orang lain, sama ada sebagai penghutang utama atau penjamin atau selainnya, dan sama ada liabiliti tersebut adalah sebenar atau kontingen);</p>
<b>Pihak Cagaran</b>	Pihak-pihak yang dinyatakan dalam Seksyen 3 Jadual 1 Perjanjian Kemudahan dan mana-mana orang lain yang menyediakan sebarang cagaran untuk menjamin Keberhutangan dan mana-mana pihak (selain daripada Bank) Dokumen Cagaran;

## 1.2 Tafsiran

Dalam Jaminan dan Tanggung Rugi ini (melainkan konteksnya menghendaki yang lain):-

- (i) perkataan yang terpakai kepada orang sebenar termasuk mana-mana badan orang, firma, perkongsian, syarikat, perbadanan, negeri, entiti pentadbiran dan/atau kerajaan dan begitu juga sebaliknya;
- (ii) rujukan kepada jantina maskulin termasuk jantina feminin dan entiti yang tidak memiliki unsur maskulin atau feminin, dan begitu juga sebaliknya;
- (iii) rujukan kepada bilangan tunggal termasuk yang majmuk dan begitu juga sebaliknya;
- (iv) rujukan kepada mana-mana undang-undang termasuk semua undang-undang sebagaimana yang dipinda, diubah suai atau digubal semula;
- (v) rujukan kepada Klausula dan Jadual, melainkan jika dinyatakan sebaliknya, hendaklah ditafsirkan sebagai rujukan kepada Klausula dan Jadual Jaminan dan Tanggung Rugi ini;
- (vi) tajuk-tajuk Klausula dimasukkan untuk rujukan sahaja dan tidak boleh dianggap, dibaca atau ditafsirkan sebagai bahagian penting Jaminan dan Tanggung Rugi ini;
- (vii) jika mana-mana perjanjian, waad, terma, syarat, dan/atau aku janji dinyatakan sebagai dibuat oleh atau bagi pihak dua atau lebih orang atau pihak, semua perjanjian, waad, terma, syarat dan/atau aku

janji tersebut disifatkan sebagai telah dibuat oleh, dan mengikat, atau boleh dikuatkuasakan oleh semua orang atau pihak tersebut secara bersesama dan berasingan;

- (viii) rujukan kepada sesuatu dokumen termasuk dokumen itu sebagaimana diubah dari semasa ke semasa dan mana-mana dokumen yang dikeluarkan atau disempurnakan sebagai tambahan atau pengganti kepada atau untuknya dari semasa ke semasa;
- (ix) jadual kepada Jaminan dan Tanggung Rugi ini akan dianggap, dibaca dan ditafsirkan sebagai bahagian penting Jaminan dan Tanggung Rugi ini;

## JAMINAN DAN TANGGUNG RUGI

Penjamin, secara tak boleh batal dan tanpa syarat, mengaku janji dan menjamin Bank, sebagai penghutang utama dan bukan hanya sebagai penjamin:

### **2 PEMBAYARAN APABILA DITUNTUT**

- (a) untuk membayar Keberhutangan kepada Bank apabila dituntut;
- (b) faedah atas sebarang amaun yang dituntut daripada Penjamin oleh Bank dan yang tidak dibayar apabila kena dibayar, dikira pada kadar yang ditetapkan dalam Perjanjian Kemudahan;
- (c) semua wang atau kemudahan lain yang dipinjamkan atau diberikan oleh, atau liabiliti yang ditanggung oleh Bank kepada Peminjam walaupun:
  - (i) peminjaman atau penanggungan liabiliti tersebut mungkin tidak sah atau melebihi kuasa (A) Peminjam atau (B) mana-mana pengarah, wakil, ejen atau orang lain yang berupa sebagai meminjam atau bertindak bagi pihak Peminjam; dan
  - (ii) terdapat apa-apa luar aturan lain dalam peminjaman atau penanggungan liabiliti tersebut.

### **3 WAAD-WAAD PENJAMIN**

Penjamin selanjutnya bersetuju, mengaku janji dan berwaad dengan Bank seperti berikut: -

- (a) Liabiliti Utama

bahawa untuk menguatkuasakan peruntukan Jaminan dan Tanggung Rugi ini dengan sepenuhnya: -

- (i) Penjamin mengetepikan semua hak yang tidak konsisten dengan peruntukan Jaminan dan Tanggung Rugi ini dan yang Penjamin mungkin sebaliknya berhak untuk menuntut dan menguatkuasakannya sebagai penjamin;
- (ii) Penjamin tidak akan dilepaskan oleh apa-apa fakta, keadaan, tindakan atau peninggalan sama ada diketahui oleh Bank atau tidak, atau yang olehnya liabiliti Penjamin di bawah Jaminan dan Tanggung Rugi ini akan dilepaskan jika Penjamin bukan merupakan penghutang utama;
- (iii) liabiliti Penjamin di bawah Jaminan dan Tanggung Rugi ini akan wujud dan tidak akan dilepaskan, dikurangkan atau terjejas, sama ada atau tidak:

- (I) Bank berhak untuk membuat tuntutan, atau telah membuat tuntutan, terhadap Peminjam dan/atau mana-mana penjamin atau pemberi cagaran lain; dan/atau
  - (II) Bank telah mengambil apa-apa cagaran lain pada masa ini, atau mungkin mengambilnya daripada Peminjam atau mana-mana orang lain pada masa hadapan pada bila-bila masa atau dari semasa ke semasa untuk menjamin Keberhutangan, atau telah gagal untuk mengambil sebarang cagaran lain untuk menjamin Keberhutangan;
  - (III) Bank telah menguatkuasakan, atau gagal menguatkuasakan sebarang cagaran lain yang diambil untuk menjamin Keberhutangan;
  - (IV) Bank telah memfailkan bukti hutang jika Peminjam telah diisytiharkan bankrap atau sedang berada dalam penyelesaian (yang mana berkenaan) [dan dalam kes sedemikian, amaun penuh Keberhutangan hendaklah dibayar oleh Penjamin;
- (iv) semua jumlah yang perlu dibayar oleh Penjamin di bawah Jaminan dan Tanggung Rugi ini akan dibayar sepenuhnya tanpa tolak selesai, tuntutan balas, syarat atau pembatasan;
- (v) bahawa kebangkrapan, penggulungan, insolvensi dan/atau penyelesaian, kematian, kehilangan akal, kehilangan upaya, kekurangan keupayaan, pelaksanaan salah Jaminan dan Tanggung Rugi ini atau penentuan liabiliti mana-mana satu Penjamin atau atas apa-apa sebab lain:
- (I) tidak akan mengakibatkan prejudis terhadap atau menjejaskan liabiliti orang lain yang menjadi Penjamin di bawah Jaminan dan Tanggung Rugi ini; dan
  - (II) akan mengikat dan berkuat kuasa sehingga dilepaskan oleh pelaksanaan oleh orang lain yang menjadi Penjamin dan pembayaran Keberhutangan sepenuhnya;
- (b) bahawa Bank boleh:
- (i) memodalkan dan mengenakan faedah atas Keberhutangan dan hak ini akan wujud dan terus wujud, sama ada atau tidak terdapatnya tuntutan pembayaran apa-apa wang di bawah Jaminan dan Tanggung Rugi ini, sebelum dan selepas penghakiman dan walaupun hubungan bank-pelanggan antara Bank dan Peminjam dan/atau Penjamin (yang mana berkenaan) telah terhenti atas sebarang sebab;
  - (ii) memberikan atau enggan memberikan kemudahan perbankan dan/atau lain-lain kemudahan kredit, pinjaman pendahuluan, overdraf atau pinjaman kepada Peminjam, sama ada dengan atau tanpa notis kepada Penjamin;
  - (iii) memberikan apa-apa masa atau kelonggaran kepada Peminjam, Penjamin atau mana-mana orang lain;
  - (iv) memperbaharui sebarang bil, nota, atau instrumen boleh niaga lain;
  - (v) berurusan dengan, menukar, melepaskan, mengubah suai atau tidak menyempurnakan atau menguatkuasakan sebarang cagaran atau jaminan atau hak yang mungkin dipunyai Bank pada masa ini atau pada bila-bila masa hadapan daripada atau terhadap Peminjam atau mana-mana orang atau orang-orang lain; dan/atau

(vi) mencapai persetujuan dengan Peminjam, Penjamin dan/atau mana-mana orang lain.

(c) Pembukaan Akaun Baru

bahawa selepas wang yang dijamin di bawah Jaminan dan Tanggung Rugi ini telah dituntut daripada Penjamin, Bank boleh membuka akaun yang baru atau berasingan untuk Penjamin dalam buku akaunnya. Walaupun Bank sebenarnya tidak membuka akaun baru atau berasingan tersebut, namun Bank akan disifatkan sebagai telah melakukannya pada masa itu. Selepas itu, semua pembayaran ke dalam akaun yang dibuat oleh Penjamin kepada Bank akan, (melainkan terdapat kaedah atau anggapan undang-undang atau ekuiti yang sebaliknya), dikreditkan atau disifatkan sebagai telah dikreditkan pada akaun baru atau berasingan tersebut (sama ada sebenarnya dibuka atau disifatkan sebagai telah dibuka), dengan syarat sentiasanya bahawa peruntukan Klausula ini tidak akan menjejaskan cagaran yang selainnya tersedia untuk pembayaran Keberhutangan;

(d) Perubahan

bahawa Bank boleh mengubah dan/atau meminda terma dan/atau syarat Jaminan dan Tanggung Rugi ini dengan memberikan notis bertulis kepada Penjamin sekurang-kurangnya dua puluh satu (21) hari terlebih dahulu;

(e) Keterangan Muktamad

(A) apa-apa pengakuan secara bertulis oleh Peminjam atau oleh mana-mana orang lain yang diberi kuasa oleh Peminjam mengenai Keberhutangan yang terhutang oleh Peminjam kepada Bank dan/atau (B) apa-apa penghakiman yang didapatkan oleh Bank terhadap Peminjam berkenaan dengan amaun yang terhutang oleh Peminjam kepada Bank akan mengikat dan bersifat muktamad terhadap Penjamin, dan bahawa suatu kenyataan bertulis daripada Bank tentang amaun yang kena dibayar dan terhutang oleh Peminjam akan diterima oleh Penjamin sebagai keterangan muktamad bahawa amaun yang dinyatakan pada kenyataan bertulis tersebut kena dibayar oleh Peminjam kepada Bank, dan kena dibayar kepada Bank oleh Penjamin apabila dituntut;

(f) Pelarasan

bahawa jika Bank telah menerima baki terakhir tersebut sepenuhnya, sebarang tuntutan oleh Penjamin untuk mana-mana lebihan atau apa-apa cagaran yang tinggal di tangan Bank akan menjadi suatu perkara pelarasan antara Bank, Penjamin dan mana-mana orang lain yang membuat tuntutan yang sama;

(g) Cagaran Balas

bahawa Penjamin tidak akan, kecuali dengan persetujuan Bank secara bertulis terlebih dahulu, mengambil (sama ada secara langsung atau tidak langsung) apa-apa cagaran balas sama ada melibatkan gadaian ke atas harta Peminjam atau sebaliknya, yang Penjamin mungkin, jika berlakunya insolvensi Peminjam dan menjejaskan Bank, meningkatkan bukti Penjamin dalam insolvensi tersebut atau mengurangkan harta yang boleh diagihkan antara para pemiutang Peminjam. Sebarang cagaran balas tersebut yang diambil oleh Penjamin dengan persetujuan Bank akan menjadi cagaran kepada Bank untuk memenuhi obligasi Penjamin di bawah Jaminan dan Tanggung Rugi ini;

(h) Lien dan Tolak Selesai

Penjamin juga secara nyata dan tidak boleh ditarik balik bersetuju bahawa apabila berlakunya peristiwa ingkar terhadap Kemudahan atau selepas tuntutan telah dibuat, Bank boleh pada bila-bila masa, dengan notis bertulis sekurang-kurangnya 7 hari terlebih dahulu kepada saya/kami, dan tanpa perlu sebelumnya:

(i) mengambil tindakan terhadap sebarang cagaran atau jaminan lain bagi pembayaran baki tertunggak Kemudahan; atau

(ii) mengambil apa-apa langkah atau prosiding terhadap Peminjam,

mengeluarkan dan/atau menarik balik mana-mana atau semua akaun Penjamin dan/atau menggunakan, memindah atau menolak selesai wang dalam akaun tersebut (sama ada wang pokok atau faedah dan sama ada sepenuhnya atau sebahagiannya) untuk pembayaran atau penyelesaian semua atau sebahagian daripada Keberhutangan. Jika mana-mana akaun adalah dalam mata wang selain daripada Ringgit Malaysia, Bank boleh menukarkan baki kredit dalam akaun tersebut kepada Ringgit Malaysia pada kadar pertukaran serta-merta pada hari itu. Penjamin bersetuju bahawa Bank tidak akan bertanggungjawab terhadap sebarang kerugian yang ditanggung oleh Penjamin disebabkan pelaksanaan hak Bank termasuk (tanpa had) apa-apa kerugian faedah, kecuali setakat kerugian tersebut dapat dianggap berpunca sepenuhnya daripada kecuaiian melampau atau keingkaran sengaja Bank.

(i) Hutang Subordinat

sebarang amaun yang kena dibayar dan terhutang oleh Peminjam kepada Penjamin pada masa ini atau masa hadapan ("**Hutang Peminjam**") adalah berperingkat subordinat berbanding dengan Keberhutangan Peminjam. Jika Bank menghendaki, Hutang Peminjam kepada Penjamin akan dipungut, dikuatkuasakan dan diterima oleh Penjamin sebagai amanah untuk Bank dan dibayar kepada Bank berdasarkan Keberhutangan Peminjam tanpa mengurangkan atau menjejaskan liabiliti Penjamin di bawah Jaminan dan Tanggung Rugi ini;

(j) Pelepasan/Kompromi

bahawa liabiliti Penjamin di bawah Jaminan dan Tanggung Rugi ini tidak akan dilepaskan, dikurangkan atau terjejas oleh sebarang pelepasan atau kompromi dengan Peminjam sama ada Penjamin mendapat apa-apa notis pelepasan, kompromi atau persetujuan sedemikian atau tidak, dan sama ada Bank telah mengekalkan haknya terhadap Peminjam atau tidak.

(k) Penukaran Penjamin

Cagaran, liabiliti dan obligasi Penjamin di bawah Jaminan dan Tanggung Rugi ini akan terus sah, mengikat dan boleh dikuatkuasakan bagi semua tujuan walaupun terdapatnya perubahan melalui penggabungan, pembentukan semula atau selainnya dalam pembentukan Bank dan/atau Peminjam dan/atau Penjamin. Apa-apa perubahan yang menjejaskan Bank, Peminjam dan/atau Penjamin tidak akan menjejaskan cagaran, liabiliti dan obligasi yang diwujudkan di bawah Jaminan dan Tanggung Rugi ini.

(l) Penjamin Bukan Pemastautin

jika Penjamin adalah bukan pemastautin, liabiliti Penjamin di bawah Jaminan ini adalah bagi pembayaran amaun yang terhutang dalam Ringgit Malaysia. Walau bagaimanapun, jika menurut mana-mana kaedah atau peraturan pentadbiran pertukaran asing:

- (i) Jaminan ini disifatkan sebagai diberikan oleh Penjamin dalam denominasi mata wang seperti yang dinyatakan dalam Jadual 7 di bawah dan yang sama nilainya dengan wang yang dimaksudkan untuk dijamin di bawah Jaminan dan Tanggung Rugi ini;
- (ii) pembayaran oleh Penjamin tidak dapat dibuat dalam Ringgit Malaysia, maka pembayaran di bawah Jaminan ini akan dibuat oleh Penjamin dalam denominasi mata wang sebagaimana yang dinyatakan dalam Seksyen 7 Jadual, yang hendaklah mempunyai nilai yang sama dengan wang yang dimaksudkan untuk dijamin di bawah Jaminan dan Tanggung Rugi ini; dan
- (iii) sebarang kelulusan yang diperlukan hendaklah dimohon dan diperolehi oleh Penjamin bukan pemastautin itu.

(m) Faedah

Hak Bank untuk menyifatkan faedah sebagai wang pokok dan mengenakan faedah seperti yang diperuntukkan dalam Jaminan dan Tanggung Rugi ini akan wujud dan terus wujud:

- (i) walaupun pengeluaran dan/atau penyampaian suatu tuntutan pembayaran untuk apa-apa wang yang dijamin oleh Jaminan dan Tanggung Rugi; dan
- (ii) sebelum dan selepas penghakiman antara Bank dan Penjamin; dan
- (iii) walaupun hubungan bank-pelanggan antara Bank dan (i) Peminjam dan/atau (ii) Penjamin (yang mana berkenaan) telah terhenti atas apa-apa sebab.

#### **4 TANGGUNG RUGI**

Penjamin seterusnya bersetuju, mengaku janji, mengesahkan dan berwaad dengan Bank, tanpa menjejaskan mana-mana obligasi Penjamin terhadap Bank, untuk menanggung rugi dan memastikan Bank ditanggung rugi terhadap semua kerugian, tindakan, prosiding, tuntutan, kos, kerosakan dan/atau perbelanjaan (termasuk kos perundangan atas dasar tanggung rugi penuh) yang mungkin ditanggung atau dialami oleh Bank oleh sebab sebarang pelanggaran mana-mana terma dan syarat dalam Perjanjian Kemudahan atau Jaminan dan Tanggung Rugi ini atau Dokumen Cagaran lain oleh Peminjam dan/atau Penjamin.

#### **5 NOTIS TUNTUTAN**

- (a) Notis, tuntutan dan komunikasi lain kepada Bank akan dihantar ke alamatnya yang dinyatakan dalam Jaminan dan Tanggung Rugi ini, atau seperti yang dimaklumkan oleh Bank kepada Penjamin. Sebarang notis yang perlu diberikan (i) mestilah secara bertulis; (ii) ditandatangani oleh Penjamin dan (iii) hanya akan berkuat kuasa apabila diterima oleh, dan dibuktikan dengan suatu pengakuan oleh Bank, atau jika berkenaan, diberikan melalui saluran yang dibenarkan oleh Bank.

- (b) Notis, tuntutan dan komunikasi lain kepada Penjamin akan dihantar melalui mana-mana kaedah berikut dan akan disifatkan sebagai telah disampaikan kepada Penjamin dengan sewajarnya:
- (i) jika dihantar sendiri, pada masa penghantaran atau pengiriman; atau
  - (ii) jika dihantar melalui pos, pada hari ketujuh (7) selepas penghantaran; atau
  - (iii) jika dihantar melalui kurier, dengan segera apabila Penjamin memperakui nota konsainan kurier; atau
  - (iv) jika dihantar dengan apa-apa bentuk komunikasi serta-merta (termasuk tetapi tidak terhad kepada e-mel, perkhidmatan pesanan ringkas (sms) dan rakaman suara), dengan serta-merta; atau
  - (v) jika melalui penerbitan pada laman web Bank atau di mana-mana cawangan Bank, pada hari penerbitan.
- (c) Penjamin bertanggungjawab untuk memastikan bahawa apa-apa notis yang dihantar melalui mana-mana kaedah yang dinyatakan di atas tidak dibaca atau diakses oleh mana-mana pihak ketiga. Bank tidak akan bertanggungjawab dalam apa cara sekalipun untuk apa-apa kesipuan yang terhasil atau untuk sebarang kerugian atau kerosakan yang timbul, akibat tindakan pihak ketiga yang membaca atau mengakses notis tersebut.
- (d) Sebarang notis yang diberikan oleh Bank, termasuk apa-apa notis tuntutan untuk wang yang dipinjamkan atau didahulukan oleh Bank kepada Penjamin boleh ditandatangani bagi pihak Bank oleh seorang pengarah, pengurus besar, pengurus, penolong pengurus, pegawai atau oleh mana-mana peguam cara daripada firma peguam yang bertindak bagi pihak Bank. Jika notis itu dijana komputer, ia tidak perlu ditandatangani.
- (e) Penjamin mestilah memberikan notis yang sebenar kepada Bank tentang sebarang perubahan dalam alamat supaya perubahan alamat itu berkuat kuasa dan mengikat Bank. Jika terdapat sebarang perubahan kepada (i) nombor telefon; (ii) alamat e-mel; dan/atau (iii) butiran lain yang direkodkan dengan Bank berkenaan dengan Penjamin (secara kolektif "**Butiran Peribadi**"), Penjamin mesti memaklumpkannya kepada Bank dengan segera untuk memastikan bahawa semua surat-menyurat dan/atau komunikasi sampai kepada Penjamin tepat pada masanya.
- (f) Penjamin bersetuju bahawa apabila sebarang tuntutan pembayaran dibuat, Penjamin akan membayar jumlah yang dituntut dalam tempoh yang ditetapkan dalam notis tuntutan itu. Jika Penjamin gagal membuat pembayaran dalam tempoh tersebut, Bank berhak untuk menguatkuasakan semua hak dan remedi undang-undangnya dan boleh mengambil semua tindakan sebagaimana yang difikirkannya semunasabahnya patut untuk mendapatkan balik jumlah tertunggak yang kena dibayar kepada Bank.

## 6 EJEN PENYAMPAIAN

Penjamin secara tidak boleh ditarik balik melantik Peminjam sebagai ejen Penjamin bagi penyampaian apa-apa tuntutan, notis, writ, saman, penghakiman atau proses undang-undang lain, dan memberi kuasa kepada Peminjam untuk menerima penyampaian tuntutan, notis, writ, saman, penghakiman atau proses undang-undang lain tersebut bagi pihak Penjamin. Penjamin akan disifatkan sebagai telah diberitahu tentang proses undang-undang itu apabila notis tersebut diakui sebagai diterima oleh Peminjam.



Sebarang kegagalan Peminjam untuk memberikan notis kepada mana-mana Penjamin, tidak akan menjejaskan atau mengurangkan kesahan apa-apa prosiding dan/atau penghakiman atau perintah yang berasaskannya, dengan syarat bahawa tiada apa yang terkandung dalam Klausula ini akan disifatkan sebagai menjejaskan hak Bank untuk menyampaikan proses undang-undang tersebut dengan kaedah lain yang dibenarkan di sisi undang-undang.

## 7 REPRESENTASI DAN WARANTI

Penjamin memberikan representasi dan waranti kepada Bank bahawa: -

- (a) Penjamin berfikiran waras, mempunyai kuasa dan keupayaan penuh untuk melaksanakan, menyampaikan dan menjalankan semua obligasi masing-masing di bawah Jaminan dan Tanggung Rugi ini;
- (b) obligasi Penjamin di bawah Jaminan dan Tanggung Rugi ini merupakan obligasi Penjamin yang sah, sah dan mengikat dan boleh dikuatkuasakan terhadap Penjamin mengikut terma Jaminan dan Tanggung Rugi ini;
- (c) obligasi Penjamin di bawah Jaminan dan Tanggung Rugi ini merupakan obligasi Penjamin yang langsung, tidak bersyarat, tidak subordinat, tidak boleh ditarik balik dan am, dan yang akan berperingkat *pari passu* (iaitu mempunyai kedudukan yang sama) dengan semua liabiliti tanpa cagaran lain Penjamin yang langsung atau kontingen;
- (d) penandatanganan dan penyampaian Jaminan dan Tanggung Rugi ini dan pelaksanaan obligasi Penjamin dan/atau penggunaan hak-haknya di bawah Jaminan dan Tanggung Rugi ini tidak akan: -
  - (i) melanggar atau merupakan keingkaran di bawah mana-mana peruntukan yang terkandung dalam sebarang perjanjian, instrumen, undang-undang, penghakiman, perintah, lesen, permit atau kebenaran yang menjejaskan atau mengikat Penjamin, asetnya atau hasilnya;
  - (ii) menyebabkan apa-apa batasan terhadap Penjamin, dan jika Penjamin merupakan suatu perbadanan, kuasa-kuasa pengarahannya, sama ada yang dikenakan oleh atau terkandung dalam sebarang dokumen atau mana-mana undang-undang, perintah, penghakiman, perjanjian, instrumen atau selainnya, dilebihi; atau
  - (iii) mengakibatkan, atau mewajibkan Penjamin untuk mewujudkan sebarang gadaian ke atas keseluruhan atau mana-mana bahagian asetnya atau hasilnya, pada masa ini atau masa hadapan;
- (e) Penjamin tidak melanggar atau menyalahi sebarang undang-undang atau peraturan, perintah, francais, konsesi, lesen, permit, kuasa, perjanjian, aku janji, instrumen, perkiraan, obligasi atau kewajipan yang terpakai kepada Penjamin atau mana-mana asetnya atau hasilnya jika pelanggaran, perbuatan menyalahi atau keingkaran tersebut mungkin menjejaskan secara material dan bermudarat: aset,
  - (i) liabiliti, atau keadaan (kewangan atau sebaliknya) Penjamin; atau
  - (ii) keupayaan Penjamin untuk melaksanakan obligasinya di bawah Jaminan dan Tanggung Rugi ini.

Tiada peristiwa ingkar atau peristiwa ingkar prospektif telah berlaku yang merupakan suatu keingkaran di bawah sebarang perjanjian, aku janji atau instrumen lain; dan tiada peristiwa atau peninggalan telah berlaku yang memberikan hak, atau yang dengan pemberian notis, luput masa dan/atau pemenuhan apa-apa syarat lain boleh memberikan hak, kepada mana-mana pemiutang Penjamin untuk mengisytiharkan bahawa apa-apa hutang Penjamin kepada pemiutang telah genap masa dan perlu dibayar sebelum kematangannya yang ditetapkan, dan/atau untuk membatalkan atau menamatkan sebarang kemudahan kredit, atau untuk menolak bagi membuat pinjaman pendahuluan di bawah kemudahan tersebut;

- (f) bahawa dengan Penjamin melaksanakan Jaminan dan Tanggung Rugi ini, pelaksanaan tersebut tidak akan menjadi suatu peristiwa ingkar atau peristiwa ingkar prospektif di bawah mana-mana perjanjiannya dengan pihak ketiga, atau tiada pelanggaran sebarang undang-undang, peraturan atau perintah yang mengikat Penjamin;
- (g)
  - (i) tiada prosiding undang-undang, atau prosiding kebangkrapan atau insolvensi yang terancam atau belum selesai terhadap Penjamin;
  - (ii) Penjamin bukan bankrap yang belum dilepaskan, telah digulung atau tidak solven;
  - (iii) Penjamin tidak melanggar mana-mana perintah mahkamah atau penghakiman;
  - (iv) tiada perkiraan sukarela telah dibuat atau dicadangkan untuk dibuat oleh Penjamin dengan pemiutangnya;
  - (v) tiada penerima dan/atau pengurus telah dilantik untuk mengambil alih aset dan/atau perniagaan Penjamin;
  - (vi) tiada permohonan telah dibuat atau belum selesai oleh mana-mana orang untuk suatu perintah supaya (I) Penjamin diletakkan di bawah pengurusan kehakiman dan (II) seorang pengurus kehakiman dilantik; atau
  - (vii) tiada bentuk perkiraan atau persetujuan penyelesaian (secara sukarela atau sebaliknya) yang dibuat atau dicadangkan untuk dibuat oleh Penjamin dengan pemiutangnya;
- (h) tiada litigasi, timbang tara, prosiding pentadbiran atau tuntutan yang mungkin (i) memberikan kesan yang material dan bermudarat terhadap perniagaan, aset atau keadaan Penjamin, atau (ii) menjejaskan secara material dan bermudarat liabiliti Penjamin untuk mematuhi atau melaksanakan obligasinya di bawah Jaminan dan Tanggung Rugi ini, sedang berjalan atau belum selesai pada masa ini atau, sepanjang pengetahuan, maklumat dan kepercayaan Penjamin (selepas siasatan yang patut dan wajar), terancam terhadap Penjamin atau mana-mana aset Penjamin;
- (i) bahawa semua butiran, akuan dan kenyataan yang diberikan dan dibuat oleh Penjamin kepada Bank adalah benar, tepat dan lengkap, dan tidak meninggalkan apa-apa fakta material; dan
- (j) semua wang yang akan dibayar oleh Penjamin kepada Bank adalah daripada sumber yang sah, dan sumber setiap bayaran tidak melanggar Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 atau undang-undang serupa yang terpakai dalam bidang kuasa dari mana wang itu berasal, atau mana-mana undang-undang cukai yang kepadanya Penjamin tertakluk.

- (k) setiap representasi dan waranti di atas akan merupakan representasi dan waranti yang berterusan (dengan merujuk kepada fakta dan keadaan yang wujud pada masa itu) sepanjang kesahan Jaminan dan Tanggung Rugi ini.

## **8 PELEPASAN HANYA MELALUI PELAKSANAAN**

Penjamin bersetuju bahawa Jaminan dan Tanggung Rugi ini dan obligasi Penjamin di bawah Jaminan dan Tanggung Rugi ini tidak akan dipenuhi dan dilepaskan kecuali apabila Penjamin membayar semua (i) Keberhutangan, dan (ii) juga wang yang kena dibayar dan terhutang oleh Penjamin pada masa ini atau masa hadapan (sama ada sepenuhnya atau bersesama dengan mana-mana orang, firma atau syarikat lain, dan sama ada sebagai prinsipal atau penjamin) atau yang baginya Penjamin mungkin bertanggungjawab terhadap Bank dengan apa jua cara.

## **9 PENGUNTUKAN BAYARAN**

Apa-apa wang yang diterima daripada Penjamin boleh diletakkan dan disimpan dalam akaun tergantung untuk memudahkan pelepasan mana-mana obligasi yang perlu dilaksanakan oleh Peminjam dan/atau Penjamin berkaitan dengan Kemudahan. Jika terdapatnya kurangan dalam hasil daripada tindakan perampasan/mendapatkan balik dan berlakunya prosiding dalam atau yang setanding dengan kebangkrutan, penyelesaian, persetujuan penyelesaian atau perkiraan, Bank boleh membuktikan dan bersetuju untuk menerima sebarang dividen atau persetujuan penyelesaian berkenaan dengan kurangan tersebut.

## **10 PENEPIAN, HAK KUMULATIF**

Tiada kegagalan, kelewatan atau peninggalan pihak Bank untuk menjalankan sebarang hak atau kuasa di bawah Jaminan dan Tanggung Rugi ini apabila berlakunya apa-apa keingkaran oleh pihak Penjamin akan (i) mengurangkan mana-mana hak atau kuasa tersebut, atau (ii) ditafsirkan sebagai suatu penepian atau sebarang persetujuan dengan keingkaran tersebut. Selanjutnya, apa-apa tindakan atau apa-apa persetujuan oleh Bank berkenaan dengan sebarang keingkaran tidak akan menjejaskan atau mengurangkan mana-mana hak atau kuasa Bank berkenaan dengan apa-apa keingkaran yang lain atau kemudian.

Jika sebarang wang terhutang dan dijamin oleh Jaminan dan Tanggung Rugi ini, wang itu akan disifatkan sebagai terhutang dan dijamin sedemikian tanpa menghiraukan apa-apa:

- (i) pembatasan atau ketakpercayaan Peminjam atau mana-mana Penjamin di sisi undang-undang; atau
- (ii) kesalahan di sisi undang-undang, luar aturan, ketidakbolehan penguatkuasaan, ketaksahan atau kecacatan dalam peruntukan Jaminan dan Tanggung Rugi ini atau Dokumen Cagaran lain; dan/atau
- (iii) pembelaan antara Peminjam dan Bank dan/atau Penjamin dan Bank berkaitan dengan pinjaman.

## **11 FAEDAH KE ATAS JUMLAH KEHAKIMAN**

Jika penghakiman dicatat terhadap Penjamin berkaitan dengan apa-apa jumlah wang yang kena dibayar di bawah Jaminan dan Tanggung Rugi ini dan menghendaki Penjamin supaya membayar apa-apa jumlah wang kepada Bank, faedah akan perlu dibayar kepada Bank pada kadar yang ditetapkan dalam Perjanjian Kemudahan atau pada kadar lain sebagaimana yang ditetapkan atau diubah oleh Bank dari semasa ke semasa (dengan memberikan notis sekurang-kurangnya dua puluh satu (21) hari kepada Penjamin tentang perubahan tersebut), sehingga tarikh pembayaran penuh jumlah wang yang diputuskan sebagai perlu dibayar kepada Bank oleh Penjamin.

## **12 PEMBAYARAN TANPA POTONGAN UNTUK CUKAI**

Semua bayaran yang dibuat oleh Penjamin mestilah tanpa tolak selesai, tuntutan balas, potongan atau penahanan. Jika terdapat apa-apa potongan atau penahanan, Penjamin hendaklah membayar kepada Bank suatu amaun tambahan dengan segera supaya amaun bersih yang diterima oleh Bank akan sama dengan amaun penuh yang sepatutnya diterima oleh Bank tanpa potongan atau penahanan itu.

## **13 HAK UNTUK MENYERAHHAKKAN**

Penjamin bersetuju untuk tidak menyerahhakkan atau memindahkan sebarang hak, manfaat dan/atau obligasinya di bawah Jaminan dan Tanggung Rugi ini kepada mana-mana orang tanpa persetujuan bertulis daripada Bank terlebih dahulu. Bank boleh, dengan notis bertulis terlebih dahulu kepada Penjamin, menyerahhakkan hak, manfaat dan/atau obligasinya di bawah Jaminan dan Tanggung Rugi ini, dengan syarat penyerahhakan atau pemindahan tersebut tidak menjejaskan hak Penjamin di bawah Jaminan dan Tanggung Rugi ini secara material dan bermudarat.

## **14 PENDEDAHAN**

Sebagai tambahan kepada pendedahan yang dibenarkan di bawah mana-mana Akta atau peraturan, Penjamin dengan nyata membenarkan Bank untuk mendedahkan apa-apa maklumat yang berkaitan dengan urusan atau akaun Penjamin (termasuk kedudukan kredit Penjamin berkaitan dengan Jaminan dan Tanggung Rugi ini dan dokumen cagaran lain yang telah ditandatangani oleh Penjamin dengan Bank) setakat yang dianggap perlu kepada:

- (i) ejen, penyedia perkhidmatan, juruaudit, penasihat undang-undang, penasihat profesional lain Bank dan syarikat berkaitannya;
- (ii) Peminjam dan/atau mana-mana pemberi cagaran lain yang telah memberikan cagaran kepada Bank berkaitan dengan Kemudahan;
- (iii) Biro Kredit dan mana-mana pihak berkuasa atau badan lain yang ditubuhkan oleh Bank Negara Malaysia atau mana-mana pihak berkuasa yang mempunyai bidang kuasa ke atas Bank;
- (iv) mana-mana penanggung insurans dalam panel Bank atau penanggung insurans yang boleh diterima oleh Bank yang dengannya Bank boleh memilih untuk mengambil insurans;
- (v) mana-mana agensi pelaporan/rujukan kredit termasuk tetapi tidak terhad kepada CTOS, FIS dan mana-mana agensi pelaporan/rujukan kredit lain, dan bagi mana-mana agensi pelaporan/rujukan

kredit ini, untuk mendedahkan maklumat kredit Penjamin kepada pelanggannya bagi tujuan pengesanan penipuan dan pencegahan penipuan;

- (vi) kepada entiti-entiti dalam kumpulan korporat CIMB Group Holdings Berhad, syarikat pemegang muktamad Bank ("**Syarikat Kumpulan**") sama ada Syarikat Kumpulan tersebut bermastautin, menjalankan perniagaan, diperbadankan atau ditubuhkan di dalam atau di luar Malaysia;
- (vii) mana-mana penerima pindahan atau pemegang serah hak yang berpotensi, yang dengannya Bank sedang merundingkan pemindahan, penyerahhak dan novasi hak atau obligasi di bawah atau dengan merujuk kepada Jaminan dan Tanggung Rugi ini;
- (viii) mana-mana institusi kewangan yang dengannya Penjamin telah atau bercadang untuk berurusan;

untuk memudahkan perniagaan, operasi, kemudahan dan perkhidmatan (termasuk tetapi tidak terhad kepada penilaian kredit, pemeriksaan fraud, ulasan kredit, pemantauan kredit, pemungutan semula hutang, dll.), atau disediakan oleh, Bank dan/atau Syarikat Kumpulan.

## **15 KLAUSA PRIVASI**

- 15.1 Penjamin dengan ini mengesahkan bahawa Penjamin telah membaca, memahami dan bersetuju untuk terikat oleh Notis Privasi Kumpulan CIMB (yang boleh didapati pada pautan [www.cimbbank.com.my](http://www.cimbbank.com.my) atau [www.cimbislamic.com](http://www.cimbislamic.com)) dan klausa-klausa yang terkandung di sini sebagaimana yang berkaitan dengan pemprosesan maklumat peribadi Penjamin. Untuk mengelakkan keraguan, Penjamin bersetuju bahawa Notis Privasi tersebut hendaklah disifatkan sebagai telah digabungkan melalui rujukan kepada Jaminan ini.
- 15.2 Sekiranya Penjamin memberikan maklumat peribadi dan kewangan yang berkaitan dengan pihak ketiga, termasuk maklumat yang berkaitan dengan waris dekat dan tanggungan Penjamin (jika Penjamin merupakan seorang individu) atau maklumat yang berkaitan dengan pengarah, pemegang saham, pegawai, penjamin individu dan pemberi cagaran (jika Penjamin merupakan suatu perbadanan), bagi tujuan mengikat Jaminan atau Kemudahan ini, Penjamin (a) mengesahkan bahawa Penjamin telah memperoleh persetujuan mereka atau sebaliknya berhak untuk memberikan maklumat ini kepada Bank dan Bank berhak menggunakannya mengikut Jaminan ini; (b) bersetuju untuk memastikan bahawa maklumat peribadi dan kewangan pihak ketiga tersebut adalah tepat; (c) bersetuju untuk memaklumkan Bank secara bertulis sekiranya berlaku apa-apa perubahan penting kepada maklumat peribadi dan kewangan tersebut; dan (d) bersetuju dengan hak Bank untuk menamatkan Kemudahan sekiranya persetujuan itu ditarik balik oleh mana-mana pihak ketiga tersebut.
- 15.3 Sekiranya Penjamin mengarahkan Bank untuk melaksanakan apa-apa jenis transaksi rentas sempadan (termasuk membuat atau menerima bayaran), butiran yang berkaitan dengan transaksi rentas sempadan itu (termasuk maklumat yang berkaitan dengan mereka yang terlibat dalam transaksi tersebut) boleh diterima dari atau dihantar ke luar negara, di mana ia boleh diakses (sama ada secara langsung atau tidak langsung) oleh pengawal selia dan pihak berkuasa luar negara berkaitan dengan tugas sah mereka (misalnya pencegahan jenayah). Dalam mengarahkan Bank dan/atau ejen Bank untuk memasuki mana-mana transaksi rentas sempadan bagi pihak Penjamin, Penjamin bersetuju dengan pendedahan yang

tersebut di atas bagi pihak Penjamin dan mereka yang lain yang terlibat dalam transaksi rentas sempadan tersebut.

- 15.4 Bank boleh pada bila-bila masa dan dari semasa ke semasa pada masa ini dan/atau pada masa hadapan menjalankan pemeriksaan rujukan yang diperlukan termasuk tetapi tidak terhad kepada pelaporan kredit/pemeriksaan rujukan dengan agensi pelaporan/rujukan kredit termasuk tetapi tidak terhad kepada CCRIS, FIS dan/atau mana-mana agensi lain dan/atau daripada mana-mana institusi kewangan untuk membolehkan kami memastikan status Penjamin sebagaimana yang diperlukan untuk membantu membuat keputusan, contohnya apabila Bank perlu (a) memeriksa butiran permohonan untuk kredit dan kemudahan berkaitan kredit atau kemudahan lain; (b) mengurus akaun atau kemudahan kredit dan berkaitan kredit, termasuk menjalankan semakan portfolio Penjamin; dan/atau memungut semula hutang. Penjamin akan dikaitkan oleh agensi pelaporan/rujukan kredit kepada mana-mana nama lain yang digunakan oleh Penjamin, dan mana-mana pemohon bersama dan berasingan. Bank juga boleh berkongsi maklumat tentang Penjamin dan cara Penjamin melaksanakan dan mengurus obligasi Penjamin yang terkandung di sini dengan agensi pelaporan/rujukan kredit yang berkaitan, dan bagi mana-mana agensi pelaporan kredit/rujukan untuk mendedahkan maklumat kredit Penjamin kepada pelanggannya untuk tujuan pengesanan fraud dan pencegahan fraud.
- 15.5 Walaupun selepas Penjamin telah memberikan sebarang maklumat kepada Bank, Penjamin akan mempunyai pilihan untuk menarik balik persetujuan yang diberikan sebelumnya. Dalam hal sedemikian, Bank berhak untuk tidak menyediakan atau menghentikan apa-apa produk, perkhidmatan, akaun dan/atau kemudahan yang berkaitan dengan maklumat tersebut dengan notis bertulis kepada Penjamin sekurang-kurangnya 3 hari perniagaan terlebih dahulu.
- 15.6 Bank berhak untuk meminda klausa ini dari semasa ke semasa mengikut budi bicara tunggalnya dan hendaklah memberikan notis bertulis kepada Penjamin tidak kurang daripada dua puluh satu (21) hari terlebih dahulu, dan meletakkan sebarang pindaan tersebut pada laman web Bank dan/atau dengan meletakkan notis di dewan perbankan atau di lokasi utama di dalam cawangan Bank.
- 15.7 Bagi tujuan klausa ini, Kumpulan CIMB terdiri daripada CIMB Group Holdings Berhad dan semua syarikat yang berkaitan dengannya seperti yang ditakrifkan dalam Seksyen 7 Akta Syarikat 2016, dan syarikat-syarikat kawalan bersama yang menyediakan perkhidmatan kewangan dan lain-lain perkhidmatan yang dikawal selia, tidak termasuk syarikat, cawangan, pejabat dan bentuk kehadiran lain yang beroperasi di luar Malaysia, dan penggunaan perkataan "Bank" hendaklah dibaca sebagai rujukan kepada Kumpulan CIMB.
- 15.8 Klausa ini tidak menjejaskan apa-apa klausa lain dalam Jaminan dan Tanggung Rugi ini yang memperuntukkan pendedahan maklumat.

## **16 KOS DAN PERBELANJAAN**

Penjamin akan bertanggungjawab untuk membayar semua kos dan perbelanjaan berkaitan dengan penyediaan, pelaksanaan dan penyempurnaan Jaminan dan Tanggung Rugi ini, termasuk fi peguam cara Bank (atas dasar peguam cara dan klien).

**17 KESALAHAN DI SISI UNDANG-UNDANG**

Apa-apa peruntukan Jaminan dan Tanggung Rugi ini yang adalah atau menjadi tidak sah, menyalahi undang-undang atau tidak boleh dikuatkuasakan hanya akan tidak berkesan setakat yang perlu dan tidak akan menjejaskan atau mengurangkan kesahan, keundangan dan/atau kebolehan penguatkuasaan peruntukan lain Jaminan dan Tanggung Rugi ini. Saya/Kami bersetuju, atas permintaan oleh Bank, dengan penggantian mana-mana peruntukan yang tidak sah, menyalahi undang-undang atau tidak boleh dikuatkuasakan tersebut (dalam bentuk dan kandungan yang boleh diterima oleh Bank) dengan peruntukan yang sah yang mempunyai kesan yang sama setakat mungkin, dan kos jaminan dan tanggung rugi selanjutnya tersebut, (termasuk tetapi tidak terhad kepada yuran guaman), akan ditanggung oleh Penjamin.

**18 MASA**

Masa hendaklah merupakan inti pati Jaminan dan Tanggung Rugi ini.

**19 SALINAN**

Jaminan dan Tanggung Rugi ini boleh disempurnakan dalam mana-mana bilangan salinan, dan ianya mempunyai kesan yang sama seolah-olah tandatangan pada salinan dibuat pada satu salinan tunggal.

**20 UNDANG-UNDANG DAN BIDANG KUASA**

Saya/Kami dengan ini secara nyata bersetuju (i) bahawa Jaminan dan Tanggung Rugi ini akan dikawal oleh undang-undang Malaysia dan (ii) untuk patuh kepada bidang kuasa eksklusif mahkamah Malaysia.

**21 PENGGANTI AKAN TERIKAT**

Jaminan dan Tanggung Rugi ini akan mengikat:

- (i) waris, wakil diri, pemegang serah hak yang dibenarkan dan pengganti hak milik Penjamin, dan
- (ii) pengganti hak milik dan pemegang serah hak Bank.

**22 SETEM**

Adalah dengan ini dipersetujui dan diakui bahawa Jaminan dan Tanggung Rugi ini, dan dokumen cagaran lain, merupakan instrumen dalam satu transaksi untuk menjamin Kemudahan. Bagi maksud Seksyen 4(3) Akta Setem 1949, Perjanjian Kemudahan adalah disifatkan sebagai instrumen primer atau utama, sementara Jaminan dan Tanggung Rugi ini dan dokumen cagaran lain adalah disifatkan sebagai instrumen tambahan atau sekunder.

*[BAKI MUKA SURAT INI SENGAJA DIBIARKAN KOSONG]*

**JADUAL**

(yang hendaklah dianggap, dibaca dan ditafsirkan sebagai bahagian penting Jaminan dan Tanggung Rugi ini)

<b>Seksyen</b>	<b>Item</b>	<b>Butiran</b>
1.	Tarikh dan tahun Jaminan dan Tanggung Rugi	
2.	Nama, perihalan dan alamat Penjamin	
3.	Alamat Cawangan	
4.	Perihalan Kemudahan dan amaun maksimum yang diberikan	
5.	Nama, perihalan dan alamat Penjamin	
6.	Tarikh dan tahun Perjanjian Kemudahan dan/atau Surat Tawaran	
7.	Denominasi Mata Wang	[●] ("Denominasi Mata Wang")



DENGAN BERSAKSI pihak-pihak telah masing-masing menurunkan tandatangan mereka pada hari dan tahun, yang pertamanya tertulis di atas.

Ditandatangani oleh Penjamin )  
di hadapan: )  
)  
)

.....

.....

Ditandatangani oleh Penjamin )  
di hadapan: )  
)  
)

.....

.....

Meterai biasa )  
telah dicapkan di sini )  
di hadapan: )  
)

.....  
PENGARAH  
Nama:  
No. Kad Pengenalan

.....  
PENGARAH/SETIA USAHA  
Nama:  
No. Kad Pengenalan

Ditandatangani untuk dan bagi pihak )  
CIMB BANK BERHAD )  
di hadapan: )  
)

.....